

Inuit Ataqtigiit

-

Periarfissagut isigalugit

Asasara qinersisartoq,

Inatsisartunut qinersilerpugut, Inuit Ataqtigiit siulittaasuattut tamassi tikilluaquassi inuiattut siunissatta oqartussaaqtigiilluta ataatsimut isummerfiginissaanut.

Nunatta nunarsuarmi soqtigineqarnera aatsaat taama annertutigaaq. Uagutsinnut unammillernartoqarlunilu pitsaaquteqarpoq. Nunarsuarmi pissutsit allanngornerisa kingunerisaannik nunatta inissisimanerata qanoq pingaartiginera nunattalu qanoq pisuussutaasa atorpeqarusutsiginerat kingumut takoqqipparput. Maanna naalackersuinikkut sulikateriffiunerusumik ataatsimoorfissarsioqatigeqqinnissarput aatsaat taama pisariaqartigaaq, peqatigisaanillu nunatut sumut ingerlarusunnerluta qanorlu inuiaqtigiinni ineriartortitserusunnerluta ersarissuliorfiginissaa aatsaat taama pingaartigilerluni. Nunatsinni naalackersuinikkut ataatsimoorfigut aallaavigisariaqarpagut, nunarsuarmioqatitsinnullu ataatsimoorfigisagut aallaavigalugit suleqatissarsiornissarput pisariaqarpoq.

Inuttut inuiattullu ataatsimut pisariaqartitagut tassaapput toqqissisimaneq aamma kiffaanngissuseq. Ulluinnarni inooqataanerput inuiattullu siuariartorusunnerput tamatsinnut pisussaaffiliivoq. Inuit Ataqtigiinnut suliasatut pingaaruteqarnerpaaq tassaavoq aaqqissuussaannikkut ineriartornermi atugarissaarneruleriartortuarnissatta qulakkeernissaa. Inuussutissaqarnissarput, angerlarsimaffeqarnissarput, meerartatta perorluarnissaat, utoqqartatta pitsaasunik atugaqarnissaat, inuiaqtigiinni pisariaqartitsisut ikiorluarneqarnissaat, avatangiisivut mianeralugit ineriartornissarput suliaruartaqarpagut. Taakkua tunngavingalugit inuussutissarsiornikkut toqqissisimasumik periarfissiisumillu siuariartussaagut.

Inuiaqtigiittut unammilligassaqarpugut aamma suliasarpassuaqarpugut, kisiannili eqqaamatigu ikioqtigiinnikkut angusarpassuaqaratta, naak politikikkut isumaqtigiinnngiffeqaraluarluta akisussaaffimmik tigusinikkut aaqqiissutissarsiornikkullu inuiaqtigiinni aaqqissuussaannikkut naalackersuinikkullu alloriaateqarsimavugut. Inuit Ataqtigiit suliasagut akisussaaffinnik annertuunik nassatassallit tikilluaquagut, periarfissagulli isigalugit aaqqiissutissarsiortuarnissarput suliarissavarput. Qiningaaffimmiit qiningaaffimmut siunnerfiit allanngorartut, ikerinnakkullu qinersisisarnerit qimallugit naalackersuinikkut peqqissaarussamik suliarisanik inuiaqtigiinnut iluaqutaanerpaasussanik sulineq ingerlatissavarput. Nammineq politikkerisaq kisiat aallaavinginagu allanik isumallit suleqatiginerisigut isummat katersuutsinnerisigut inuiaqtigiinni toqqissisimanermik patajaassusermillu pilersitsissaagut. Inuiaqtigiinnut aammalu tamat oqartussaaqataanerannut iluaqutaasussanik isigisaqarsinnaassuseqarluta suleqataassaagut. Ukiunimi makkua annertuunik naalackersuinikkut aalajangigassaqarpugut tamanna pissaaq nunarsuatsinni

eqqissiviilliornerup nalaani. Aatsaat suleqatigiinnikkut ataqpeqatigiissumillu oqaloqatigiinnikkut qinikkatut tatigineqarnerput nunattalu tatigineqarnera qaffassassavarput.

Suleqatigiissutissarsiussaagut assigiinngissutsigut salliutinnagit inuiaqatigiittut ataatsimoorfigut inerartortissavagut. Naammassiniagassavut suliarissagutsigit qinikkatut sallerasaariaqarpugut suleqateqarsinnaalluta isumanillu allanik naaperiasinnaalluta.

Inuiaqatigiit naalakkersuinerinnakkut pilersinneqarsinnaanngillat. Kattuffiit, peqatigiiffiit ilisimasallit suleqatigiinnissamut suleqatiseraagut. Ataatsimoorneq angerlasimaffitsinni timersoqatigiiffitsigut atuarfimmi suliffimmilu nalunngereerparput, tamanna meerartatsinnut ingelateqqitsigu oqaatsitigut iliuutitsigullu.

Arnat angutillu, inuusuttut utoqqaallu, nunaqarfimmiut, inoqarfinniittut illoqarfimmiullu tamassi naleqarput anguniagaqarlusilu. Periarfissat marluupput, assigiinngissutsigut ukkarisinnaavagut angusaqanngitsoorluta imaluunniit oqaloqatigiinnikkut ikioqatigiinnikkullu periarfissat suleqatigiissutigisinnaavagut. Inuiaqatigiit inuunerput inooqataaffigiuminarninngortitsigu naligiinnerusumik ineriartornermut periarfissaqartitsilluta.

Piareersimavunga, nunatta ataatsimoortup siuttuuffiginissaanut, assigiinngissuserput inissaqartillugu, ataatsimoorussagulli salliutillugit ingerlatsinissamut.

Periarfissagut isigalugit nunatta Inatsisartuinut qinersinermi ilaseraatsigit, qinersinerit pisariaqartipparput.

Ikinngutinnersumik inuulluaquassi

Múte Bourup Egede, siulittaasoq.

Siammasissumik naalackersuinikkut isumaqatigiissutit

Nunatsinni inuuneq kajungernartuussaaq, innuttaasullu inuuniarnikkut periarfissaqarluarnissaat sulinitinni qitiussaaq. Nunatsinni innuttaasut pillugit, atugarissaarnerlu ajorseriaqqunagu, partiit allat suleqatigalugit ukiunut arlalinnut naalackersuinikkut ingerlavissanik isumaqatigiissutit pisariaqartippavut. Periarfissagut atorlugit naalackersuinikkut iliuuseqarsinnaajuussaagut.

Qinigaaffinnut arlalinnut atuuttussamik isumaqatigiissusiorneq inuiaqatigiinnik toqqissisimanerulersitsissaaq, inuiaqatigiillu ataatsimoorussaqaarnerannik tunngaviliissalluni.

Inuit Ataqtigiit qiningaaffiup siuliani takutipparput siammasissumik isumaqatigiissusiorsinnaalluta, naalackersuinikkullu aaqqiissutissarsiornerne partiit amerlanersaasa peqatiginissaat periarfissinniartarsimallugu.

Naligiinnginneq akiorneqassaaq

Naligiinnginneq inuiaqatigiinni toqqissiviinnermik atugarissaannginnerunermillu pilersitsisarpoq, taamaammatt naligiinngippallaamik inuuneqarnerput akiussavarput. Naligiinnginneq annikillisinnaarlugu oqartussaaffiit assigiinngitsut suleqatigiissapput. Innuttaasut ulluinnarni inuunerannut qaninnerpaat, kommuunit suleqatigissavagut. Oqartussaaffiillu ataatsimoortumik suleqatigiisinneratigut aaqqiissutissat akimmiffeqannginnissaannik qulakkeerinnissalluta. Nunatsinni angerlarsimaffeqannginneq, atugarliorneq, inooqatigiinnikkullu inuunerluuteqarneq ataatsimoorussaqaarikkut ilorraap tungaanut saatissavagut, inuiaqatigiittut ajornartorsiutigut inuup ilaqutariilluunniit kisimik aaqqitassarinnigilaat.

Ima iliorniarpugut:

- Inatsisit peqqussutit malitassallu inunnik ikiorsiinnermut aningaasatigullu tapiisarnermut tunngassuteqartut ataatsimut isigalugit torersarneqassapput. Inatsisit inunnet ikiorsiisarnermut aningaasatigullu tapiisarnermut tunngassuteqartut ataqtigiissarneqassapput taamaaliornikkut inatsisit atuutut allannngortinneqarneritigut nutarterneqarnerisigulluunniit tapiissutinut ikiorsiissutinullu allanut akornutaasinnaajunnaarsillugit. Inatsisinik peqqussutinik malitassanillu suliaqartunut atuisunullu paasiuminarnerulersitsinissaq suliarissavarput.
- Akileraartarnikkut aaqqissuusseqqinneq ingerlatarput nangissavarput, innuttaasullu aningaasaqarnikkut inissisimanerisa naligiinngippallaarnerujussuat millissavavarput. Iseritakinnerusut anaanat, ataatat kisimiittut akileraartarnikkut iluaqutserniarlugit akileraartarnikkut aaqqissuussissalluta.
- Innuttaasunut suliffeqanngitsunut, qassinilluunniit ukioqartunut, ulloq suliffiusoq tamakkerlugu sulisinnaanngitsunut suliniutit annertusassavagut. Suliffeqalernissamut

kajungernarsaanerit neqeroorutillu assigiinngitsuusariaqarput, suliffeqannginnermummi tunngaviusut arlaqarsinnaasarpur assigiinngitsuullutillu taamaattumillu aaqqiissutaasussat assigiittuaannarsinnaanatik. Periarfissat assigiinngitsuusut ilagisinnaavaat ilinnialernissamut ikorfartuinerit, pinngitsuuisinnaajunnarnermut aanngajaarniutinullu atuisuusunut katsorsanerit inooqatigiinnikkullu inuunermi tunngaviusunik imalinnk ikorfartuutaasunik siunnersuinerit.

- Inuk ataaseq kisiat aallaaviginagu ilaqutariit nukittunerulernissaannut suliniutit. Inuiaqatigiittut inooqatigiinnitsinni ikorfartugassagut ikiussavagut avatangiisaat peqatigalugit. Inuttut avatangiisigut inuunitsinni isumaqarput, inuunerpullu allannortissagutsigu avatangiisitta paasisimasaannik ikorfartorneqarnissarpur pingaaruteqarpoq. Inoqatitsinnut ikorfartuinissatsinnut anguniagaqarnitsinni nutaamik aaqqissuussissaagut, ilisimasallit paasisimasallillu peqataatillugit.

Ilinniartitaaneq

Perorsaaneq ilinniartitaanerlu imminnut ataqatigiipput, qanorluunniit ukioqaraluartunut neqeroorutaallutik aaqqissuunnissaat Inuit Ataqaqatigiinni pingaartipparpur.

Meerartatta inuiaqatigiinni kivitseqataasinnaangornissaat anguniagariuartariaqarparpur. Meeqqap naarmiuuneraniit ilinniarluni naammassinissaanut aqqu pisortanit ataqaqatigiisaakkamik aaqqissuunneqassaaq.

Meeqqureviit atuarfiit ilinniartoqarfiit suliffeqarfiillu imminut ataqaqatigiinnerusariaqarpur. Silarsuarni immikkoortortani inuunerpur iperarlugu pilersitseqaqatigiiffigisinnaasagut isigissavagut.

Nunatsinni ilinniartitaanerit nunatta inuussutissarsiornikkut tunngavigisaanik pisariaqartitaanillu aaqqissuunneqassappur. Taamatuttaaq nunatsinni atugarisaasunik, piorsarsimassutsimik, oqaatsitsinnik oqaluttuarisaanitsinnillu aallaaveqassappur, aamma pitsaassutsimikkut nunarsuarmi sumiluunniit atorsinnaassasut unammillersinnaassappur.

Ima iliorniarpugut:

- Aalisarnej inuussutissarsiutini pingaarnersaasoq ilinniartitaanikkut annertusaavigineqartariaqarpoq. Aalisartuunermiit aalisarnerp iluani ingerlataqarnermut ilinniarfiit piussappur.
- Inulerinermik inunnillu isumassuinermut suliaqartut pillugit aaqqiissutissat attanneqarsinnaasut pisariaqartinneqarpur. Ilisimasaqartut ilinniarfiit kattuffiillu peqatigalugit piffissamut qaninnerusumut ungasinnerusumullu aaqqiissuteqarnissaaq siunertaralugu katersussavagut. Sulinermi atukkat, oqartussaaffiit, suliffiillu akunnneranni

suleqatigiinnerit pilersinneqaqqullugit atortorissarutillu atorlugit siuarsaasinnaanerat aamma isiginarneqassallutik.

- Assessorissanik ilinniartitaanerit ataqatigiissaakkat aallartisarneqassapput ilinniarfiillu ineriartorsinnaaqqullugit ilinniarfiit ataatsimoortissinnaanerit isiginarneqassaaq. Assessorissanik ilinniarfiit ataatsimoornermikkut ilinniartitsinermi atortorissaarutigit sannatitigullu pisariaqartitaminnik avitseqatigiissinnaanerit pilersinneqassaaq. Ilinniarfiit ataatsimoortinneqarsinnaasut tassaasinnaapput, sanaartornerup iluani ilinniakkat, sullissinermut ingerlatsinermullu ilinniakkat aammalu ilinniakkat aalisarnermut tunngassuteqartut.
- Majoriap atornerqarnera annikillisinneqassaaq inersimasunullu 18-ileereersunut neqeroorutaassaaq. 18-it ataallugit ukiulinnut immikkut aaqqissuussamik ingerlatsisoqassaaq, inuusuttut ilinniaqqinnissaat suliffeqarnerullu silarsuaanut pulatinnissaat anguniarlugu.
- Suliffeqarfinni nunatsinneersut aqutsisuunissaat anguniarneqassaaq. Pisortat ingerlatitseqatigiiffii, Namminersorlutik Oqartussat Kommuunillu nunaqqatitta suliffeqarfiup iluani ineriartornissaannut periarfissiillutik pilersaaruteqassapput.
- Ilinniartitaanikkut pingaarnersiunissarput pisariaqarpoq. Ilinniartitaanermik aaqqissuusseqqinnerit allanngorarpallaat taarserlugit ilinniartitaaneq pillugu naalakkersuinikkut ataatsimoorussamik qinigaaffinnullu arlalinnut atuuttussamik naaperiusiussaagut.

Meeqqat atuarfiat nutaaliortifigineqassaaq

Aallaaviujuassaaq meeqqat atuarfiannit naammassisut ingerlaqqiffissaqarlutik meeqqat atuarfiat naammassissagaat.

Meeqqat atuarfiat meeqqamik kimilluunniit sorlaleeqataasarpoq, meeqqat atuarfiat iluatsittumik angusaqarfiussappat atuarfik angajoqqaallu suleqatigiittariaqarput. Meeqqap misigissavaa, atuarfiup angajoqqaallu suleqatigiinnermikkut atuarfik ilorrisimaarnartoq ilikkagaqarfiusorlu anguniartuarneqartoq.

Ima iliorniarpugut:

- Siusissukkut iliuseqarneq nukittorsarniarlugu, meeqqat atualertussat atualernissamut perorsaaniikkut piareersimaqqullugit, inoqariuserput inoqarfiillu ineriartornikkut killiffii aallaavigalungit kommunit peqatigalugit periusissiortoqassaaq. Meeqqat

naarmiuulernerminniit, meeqqerivinni, meeqqat atuarianniit ilinniarfinnut sulinerullu silarsuaanut appakaannissaanut ataqatigiissumik tunngavissaqaqqullugit.

- Tiimit atorlugit atuartitsineq ullullu atuartitsiviusussat minnerpaaffilerlugit atuartitsisarneq nalilersorneqaqqissapput, akunnerit atuariusut ikilisinneqassapput, aallaaviussaaq salliussallunilu, meeqqat ilikkarsinnaassusaat meeqqallu ukiuinut naapertuuttumik ilikkarsaaneq.
- Atuartut atuagarsornikkut nukittuffeqartut aammalu atuartut assassornikkut nukittuffillit nukittuffitik atorlugit ineriartornissaminnut periarfissaqassapput.
- Atuartut inuttut ilikkagassallu tungaatigut atuariimmiinnerminni unammillernartitsisut angajoqqaavi peqatigalugit ilaqutariit atuarianni atuariannissamut neqeroorfigineqassapput. Angajoqqaat ilaqutariit atuarianni atuariinnerminni akissarsiamikkut anaasaqaataannngitsumik ilaqutariit atuariannittarnissaat aaqqissuuneqassaaq.
- Meeqqat toqqissillutik atuariannissaat pingaarnersaassaaq. Meeqqat ilikkarniartarnerat assigiinnngitsuupput, alloriarfiusuni misilitsinnerit nalilersueriaatsillu aamma Angusakka nalilersorneqaqqissapput.
- Ukiuni kingullerni meeqqat atuarianni nalilersuinerit ilisimatusarnikkullu misissuinerit pisimapput. Inuit Ataqatigiit isumaqarpugut ilisimasat atuartunut, ilinniarfitsisunut angajoqqaanullu iluaqutinngorlugit meeqqat atuarianni atorneqassasut.

Inuit innarluutillit

Inuiaqatigiit aaqqissuusaanermikkut tamanut periarfissiinissartik pisussaaffigaat. Aamma inuit timimikkut innarluutillit, innorluutillit tarnimikkullu napparsimasut pineqartillugit. Ullumikkut inunnut innarluutilinnut aaqqissuusaanerput inunnut innarluuteqartunut inissaqartitsinngippallaarpoq. Innarluutilinnut iseruminarsaanerit, sunngiffimmi sammissassaqartitsinerit ilinniartitaanikkut aaqqissuussinikkut tapersiinerit ikiorsiinerillu inunnut innarluuteqartunut amerlasuunut periarfissaanngillat.

siunertaajuartariaqarpoq inatsisiliornermi inuit innarluutillit inuiaqatigiinni inuunitsinnut annertunerpaamik akuunissaat taamaammallu pingaartipparput inatsisit ataqatigiissakkamik inuiaqatigiinnilu kikkunnilluunniit immikkoortitsinngitsumik suliarineqarlutillu atuutsinneqartarnissat.

Naalackersuinnikkut inuit innarluutillit pillugit suliaqarnitsinni Nunatsinni Inuit Innarluutillit Kattuffiat peqataatillugu sulianik ingerlatsinissaq suliarissavarput.

Ima iliorniarpugut:

- Inunnut innarluutilinnut inatsit innarluuteqartunut illersuisoq naammassissarvarput. Inatsit inuit innarluutillit pisariaqartitaannut naapertuuttunik imaqassaaq.
- Ukiuni aggersuni qiningaaffiillu arlalinnut atuuttussamik inuit innarluutillit atugaat pitsanngorsarnissaat siunertaralugu naaperiusissiorqassaaq.
- Innarluutillit ilinniagaqarnissamik, sunngiffimmi sammisassaqartinneqarnissamik suliffeqarnissamillu pisinnaatitaaffeqarput. Pisortanit taakku atuutsinneqarneri qulakkeerumallugit nakkutilliisoqassaaq.
- Innarluutillit sumiiffinni nunallu immikkoortaanit assigiinngitsuneersut ilisimasaminnik atukkaminnillu avitseqatigiittarnissaat tapersersussavarput.
- Inuiaqatigiinni ajornartoortoqartillugu ussersorluni nutaarsiassaqartitsineq qulakkiissavarput.
- Nunatsinni innarluutillit pillugit ilisimasat annerulersinniarlugit katersisoqassaaq, kommuunit namminersorlutik oqartussat sulisartut sulisitsisullu akornanni siunnerfeqaqatigiittoqarnissaannik suliaqassaagut.

Utoqqaat

Nunatsinni utoqqalinissaaq toqqissisimanarlunilu kajungernartuussaaq. Qiningaaffimmi qaangiuttumi suliat nangillugit utoqqalinersiutit amerlanerulernissaat suliarissavarput. Periarfissat assigiinngitsut isiginiarneqartariaqarput, ukiunullu arlalinnut pilersaarusiornikkut aningaasalersorneqarnissaa suliarisariaqarparput. Nunatsinni ukioqatigiiaat nikikkiartornerannut iluaqutaasumik kinguaariit utoqqalinersiassaqartissallugit akisussaaffigaarput.

Ima iliorniarpugut:

- Utoqqalinersiat qaffanneqarnissaannik sulissaagut
- Utoqqalinersiaqarluni sulisoq sulinermini utoqqalinersianut katersisussaataitanera atorunnaarsissavarput
- Utoqqalinersiaqartussaataitanermi sinaakkutaasut allanngortinneqarnissaat suliarissavarput. Naalackersuinikkut pilersaarut, attassiinnarnissarmut ineriartortisinissamut pilersaarummi 2-mi siunnerfiusut malillugu utoqqalinersiaqarneq ataatsimut isigalugu aaqqissuussinerit suliarineqassallutik.

Utoqqaat pillugit suliniuteqarnerni tamani Kattuffik Utoqqaat Nipaat aamma Utoqqaat Oqaaseqartartuat suleqatigineqassapput.

Peqqinnissaq inooriaaserlu

Peqqissuserput inuunitsinnut aalajangiisuuvoq, peqqitsillutalu toqqissisimasarpugut. Inuttut ataasiakkaatut inuummarinnerunissarput akisussaaffigaarput, naalakkersuinikkut innuttaasut peqqinnissaqarfimmit toqqissisimanartumik pitsaassusilimmillu sullinneqarasuarnissaat akisussaaffigaarput.

Qiningaaffimmi qaangiuttumi partiit amerlanerpaataat ataatsimoorussaqaarlutik isumaqatigiissusiorsimanagerat ataqqillugu suliasat ingerlateqqinneqassapput. Peqqinnissaq pillugu isumaqatigiissutip imarisaasa piviusunngortinniarneri aallartinnikuupput isumaqatigiissuteqarfigineqartulli peqatigalugit suliat killiffii pillugit ilisimatitsisoqartarlunilu nalilersuisoqartassalluni.

Pingaarnersiuiinermilu nunatsinni tarnimikkut napparsimasut aammalu inuit kræfteqaarlutik napparsimasut pillugit iliuuseqarfigissavagut.

Ima iliorniarpugut:

- Tarnimikkut napparsimasut pillugit pinasuarnumik iliuuseqartoqassaaq. Nunanik allanik suleqateqarnikkut paarlaasseqatigiinnikkulluunniit suleqatissarsiortoqassalluni. Tarnimikkut napparsimasut immikoortortaata illutamigut sanaartorneqarluni naammassinerata ilutigisaanik suliniutit nutaat aallartisarneqassapput. Suliutit tarnimikkut napparsimasut qaningisaat Sugisaaq peqataatillugu suliarineqassapput.
- Inunnut kræfteqalersimasunut ikiorsiigasuarneqassamut iliuusissat suliarineqassapput.
- Peqqinnissaqarfimmi sulinikkut atukkat salliuatillugit, nunatsinnilu nunaqaarlutik sulisuusut ineriartortinneqarnissaat siunertaralugu suliniutit ersarissut suliarneqassapput.
- Peqqinnissaqarfimmi allannguutinik suliaqartoqartillugu innuttaasut nipaat peqataatinneqarnerallu qulakkeerneqartassaaq.
- Peqqinnissaqarfimmi aaqqissuusseqinnerni tamani innuuttaasup sullinneqarnerata pitsaasuunissaa sallerassaaq.
- Utoqqarnik sullissinermi peqqinnissaqarfik pinngitsoorneqarsinnaanngilaq taamaattumik utoqqaat sullinneqarneranni Peqqinnissaqarfik suleqatigineqassaaq.

Aningaasaqarnikkut imminut napatinneq

Anguniarparput aningaasarsiornikkut napatinnissarput, allanit aningaasaqarnikkut isumalluuteqarneq sunneruminartuusitsisarmat.

Aningaasaqarnikkut napatinnissamut namminersorluni inuussutissarsiuteqarneq ineriartortinneqartariaqarpoq peqatigisaaanillu allaffissornikkut aaqqissuusseqqinneq pisariaqarluni. Inuussutissarsiorterput aningaasaqarnerpullu ataqatigiipput, inuussutissarsiornikkut aningaasaliinigut aningaasaqarnita siuariartornissaanut qulakkeerinnissapput, aningaasaqarnikkullu nukittuumik inissinnitsigut atugarissaarnermut aningaasanik annerusunik immikkoortitsisinnaalissaagut.

Inuussutissarsornikkut atugassarititaasut eqqumaffigiuartariaqarpagut, namminersorlutik inuussutissarsiortut angisuut mikisullu nunatsinni amerlisartariaqarput pisortallu inuussutissarsiutinik ingerlatsisunut naalleraanatik sinaakkutitigut pitsanngorsaassapput.

Ima iliorniarpugut:

- Suliffeqarfiit inunnit ataasiakkaanit pigineqartut erninermi aningaasaateqarfimmit tapiiffigineqarsinnaanerannit mattunneqannginnissaat.
- Pisortat ingerlatseqatigiiffiisa unammillerfioreersuni unammillernissaat pinaveersimatinniarlugu, pisortat ingerlatseqatigiiffiisa peqataajunnaarnissamut periusissiaqarnissaat.
- Inuussutissarsiordermi inatsimmik nutarsaaneq annikillisaanerlu nangingneqassaaq
- Aallarnisaasunut periusissiamik immikkut piffinni avataanit aningaasaliivigineqartarnerup ajornakusoorfiani ikorfartuisumik suliaqartoqassaaq.
- Aallarnisaasunut periusissiaq inuusuttut arnallu amerlanerusut aallarnisaasalernerannik qularnaarinneqataassaaq.
- Aallarnisaasunut periusissiaq ajornannginnerusumik taarsigassarsisoqarsinnaanera anguniarlugu aningaasalersueqataanermut qularnaveeqquisiisarnernullu periarfissanik sukumiisunik siunnersuuteqarfiussaaq. Takornariartitsinermit immikkoortumut pilersaarut nutaaq atuutilersinneqassaaq, taamaalilluni takornariartitsinermit anguniakkap nunatta avammut tunisaani 40 procentinik ilapittueqataanera anguneqarsinnaaqqullugu
- Aatsitassanut periusissiaq nutaaq nunanik aatsitassanik eqqussuisunik, taakku nunatsinni suliniutinik ineriartortitsinermit ilapittuutaat pillugu oqaloqatiginninnerit annertusarnissaat immikkut pingaartillugu atuutilersinneqassaaq.
- Carbon capture and storagemik periarfissat nutaamik inuussutissarsiortunik ingerlatsisoqalernissaanik periarfissiiniarluni malersorneqassaaq
- Nunatta nukissiutitigut periarfissai atorluarneqassapput, avammut niuernermit aammali nunatsinni sulianik ingerlatsinermit iluaqutissanngortillugit
- Sikumik imermillu inuussutissarsiorfittut suliaqarneq pimoorunneqassaaq, inatsisillu malittarisassallu nutarterneqassapput
- Eqqumiitsuliorneq, filmiliornermit, assilialiornermit, nipilersornermit, isiginnaartitsinermit il.il. inuussutissarsiutitut pilersinneqassaaq.

- Inuussutissarsiormi ingerlatsivinni tamani piffinni ilisimasat, piffinni pilersuisut piffinnilu sulisartut akuutissavagut, taamaalilluni nunatsinni piginnaasanik inerisaasoqarsinnaaqullugu, nalitusiartortitsinerullu ilaa sapinngisamik annertunerpaaq maani nunami ingerlanneqarsinnaaqullugu.

Killilersugaanngitsumik niueqateqarneq

Aningaasaqarnikkut inuussutissarsiornikkullu nukittuumik inissinnissarput siunertarlugu nunanik sanilerisatsinnut killilersugaanngitsumik niueqatigiinnissamut isumaqatigiissusiussaagut.

Killilersugaanngitsumik niueqateqarnikkut nunanillu allanik suleqateqarnikkut aningaasaqarnikkut nammineerluta napatittuarnissarput aqutissiuutissavarput.

Nunarput tassaassaaq nuna tatiginartoq nunarsuarmioqatitsinnik niuernikkut suleqateqarsinnaasoq.

Qiningaaffimmi qaanngiuttumi nunanut allanut sillimaniarnikkullu periusissiaq 2024-2033-imut atuuttoq siunnerfiliivoq, maannalu timitalersuinissaq piffissanngorpoq. Kunngearfik Danmarki kisiat aqutigalugu suleqateqarsinnaanngilagut, niueqateqarnissamik kiffaanngissuseqarpugut.

Ima iliorniarpugut:

- Inuiaqatigiit iluaqutissaanik killilersugaanngitsumik niueqatigiinnissamut isumaqatigiissusiussaagut.

Angallanneq

Nunatsinni angallanneq mittarfissualiortoqarnerata kingunerisaanik allannguuteqarpoq. Nuummi mittarfissuaq nutaaq atorineqarpoq Ilulissani Qaqortumilu mittarfissat naammassineqassallutik. Maanna kiffartuussinissamik isumaqatigiissuteqarluni ingerlatsineq sutigut tamatigut maanna pissutsinut atulersunut naleqqussarniarlugu naalakkersuinikkut suliaqassaagut.

Ima iliorniarpugut:

- Angallassinikkut isumaqatigiissutit ataqatigiissaakkamik aaqqissuunneqarnissaat naalakkersuinikkut suliarineqassaaq. Innuttaasut angallannikkut atugassarititaat isiginiarneqassapput.
- Qaqortumi mittarfittaarnerup kingunerisaanik kiffartuussinissamut isumaqatigiissut nutarterneqassaaq. Nunatsinni namminersortut aaqqissuussinikkut periarfissaqartinneqassapput.
- Suluusalinnik mittarfittaarnissamik suliat nangittumik ingerlanneqassapput. Tasiilami mittarfittaartoqarnissaa pingaarnersiunerminni salliussaaq.

- Namminersorluni ingerlatsisunut umiarsuliveqarsinnaanera siuarsaaqataaffigissavarput. Umiarsuliveqarneq pillugu pilersaarummi umiarsualiviit nutarsarneqarnerat inerisarneqarnerallu ullumikkornit sukkanerusumik ingerlanneqassaaq
- Aqqusineqarnikkut suliat siunissami angallannikkut periarfissaalersussanut naleqquttumik suliarineqassapput. Assersuutigalugu kujataani aqqusinniornerit aammalu Sisimiut Kangerlusuullu akornanni aqqusinniornerit eqqarsaatigalugit.

Ingerlatseqatigiiffiit pisortat pigisaanut politikki

Nunatsinni siammasissumik inuusaaseqarnikkut pisortat pigisaasa inuiaqatigiinni nammaqatigiinnikkut pilersueqataanissaat pisariaqartittuassavarput. Siammasissumik inuusaaseqarnerput eriaqassavarput, tamanna kulturitsinnik assigiinngitsunik attassiinnarsimanitsinnut tunngavileeqataammat, minnerunngitsumillu nunarujussuatsinni inuiaqatigiit ataasiunitsinnik tunngaviliimmat.

Pisortat suliffeqarfiutai nunatsinni suli annertuumik qitiusumik inissisimapput. Niuernermilli annertusaanitsinni isiginiartariaqarparput piffinni assigiinngitsuni pisortat pigisaasa namminersortutut inuussutissarsiornermik inerisarneqartuni akimmisaarinnginnissaat.

Attattuassavarput pisortat pigisaat nunatta karsianuinnaq iluaqutaanatik inuiaqatigiit kaasarfiinut iluaqutaanissaat, pigisavut tamatsinnut iluaqutaanissapput.

Aalisarneq

Imartatsinni aalisakkat inuiaat kalaallit pigaat. Aalisartut nunatsinni kiffaanngissuseqarlutik ineriartortuartaqarput. Aalisartut nammineertut nukittuumik inissisimasut aningaasaqarnerput patajaannerulersippaat.

Aalisarneq aningaasarsiornikkut nappaterput iluaqutigiartaqarparput. Aalisarnermik inuussutissarsiuteqartut isertitamikkut nikinganerujussuat nalimmassarniagassavaq. Aalisariaatsinik nutaanik aalisakkanillu assigiinngitsunik niueruteqassaagut. Aalisarnikkut kaaviaartitagut amerlisartariaqarpagut. Peqassuseq mianeralugu pisortat, aalisartut biologillu suleqatigiillutik aalisarneq aningaasarsiornikkut isumannaatsumik ineriartortissavaat.

Ima iliorniarpugut:

- RG aqputigalugu toqqaannarusumik avammut niueruteqarsinnaaneq annertusaavigissavarput.
- Kangerlunni imartanilu allani misileraaneq tunngavigalugu aalisarneq siuarsarneqassaaq ilaatigut aalisarfinnik aalisariaatsinillu nutaanik ujartuinikkut.

- Niuerfiit siammasinnerusut anguniarneqassapput USA, Europa Tuluit Nunaallu aalisarnikkut isumaqatigiissuteqarfigisarpagut.
- Aalisagartassat EU-mut tunniunneqartartut nalilersorneqaqqissapput.
- Aalisarneq, suli siuarsarniarlugu nutaaliormik siunertaqarluni ilisimasaqarfik ilinniartitaanernillu aaqqissuussinissaq pilersissavarput. Pilersitsiniarnermi nunat saniligut suleqatiserineqassapput.
- Nunatsinni aalisarnerup iluani pisuussutinillu piniagaqartarneq eqqarsaarigalugu allaffissornerit nalilersuiffigineqassapput, soorlu aalisartunut sunngiffimmilu piniartartunut atugassarititat eqqarsaatigalugit. Eqaatsumik nunatta inuisa pisuussutitsinnik atuisinnaanerit aaqqissuunneqassaaq ass. pisuussutinik akuersissuteqartarnermut suleriutsit eqqarsaatigalugit.

Imminut pilersorneq – siuariartornissamut aqqut

Imminut pilersorneq imminut napatinnissamut aqqutissaavoq. Siulivut avataaniit isumalluuteqarsimangillat uagut avataaniit isumalluuteqarnitta annikillissinnissaa angussavarput.

Piniarneq, nersutaateqarneq, nunalerineq naatitsinerlu inerisarutsigit siunissamut aningaasaliissaagut. Immitsinnut pilersornerulernitsigit nunarsuatta miguinnerunissaa suleqataaffigissavarput.

Imminut pilersornerulernissamut inatsisitigut sinaakkutit, aningaasaliissutit pisariaqartinneqartut aallaavingalugit suliuartariaqarpugut. Imminut pilersornerunissamut periusissiaq siullerpaaq naammassisimalerpoq, timitalersuinissarpullu tullinnguuppoq.

Ima iliorniarpugut:

- Nunatsinni tunisassianik assartuinnermut akit ineriartortitsinissamut aporfussanngillat. Co2-mik annikinnermik eqqussukkaniit atuiffiunerat isiginiarlugu assartuussinikkut akikillisaavigineqarnissaat suliarissavarput.
- Piniarneq kisiat inuussutissarsiutigalugu najugaqarfimminni tunisaqartartut akileraartarnikkut aaqqissuussinikkut isiginiarneqassapput. Najugaqarfimmut pilersueqataaneq annaasaqaataassanngilaq.
- Pisortat pisiniartarnerani nunatsinneersunik pisisussaatitaanerit annerpaaffilerneqassaaq.
- Imminut pilersornermut tunngasumik suliaqartunik inuussutissarsiutigut aallartisaasunut aningaasaliisarfirmik pilersitsoqassaaq.

Ineqarneq pillugu inatsisinik nutarterineq

Angerlarsimaffeqarneq inummut tunngaviliisuulluinnarpoq. Inuit toqqissisimanartunik, ullutsinnut naapertuuttunik akilersinnaasaminnillu angerlarsimaffeqarnissaat anguniarparput.

Qiningaaffik qaangiuttoq ineqarneq pillugu aqqissuusseqqinnissamik isumaqatigiissut naalakkersuinikkut siunnerfiliivoq. Nunatsinni inuit amerlanerpaartaasa pisortat inissiaataaniinnerat killormut saatinniartariaqarpoq, inuit amerlanerpaartaasa akilersinaasaminnik nammineq pigisaminnik ineqarnissaat anguniarparput.

Pisortat inissiaataasa amerlasuut aserfallatsaaliorneqarnermikkut malinnaasinneqanngillat, taamaasillutalu iluarsartuussinissamut aningaasanik kinguaattooruteqarluta aningaasaqarnitsinnut kalluaasumik. Naalakkersuinikkullu akisussaassuseqartumik pilersaarusiortutalu ineqarnikkut aqqissuusseqqissaagut.

Ima iliorniarpugut:

- Inissiat iluarsartuussinissamut kinguaatsoorutit pillugit partiit akornanni paaseqatigiissutaasumik aqqissutissarisioqatigiittoqassaaq.
- Ineqarnikkut aqqissuusseqqinnermi innuttaasut akitigut eqqornerlunneqannginnissaat siunertaralugu partiit akornanni naaperiusissiusaagut.

Aatsitassarsiorneq akueraarput – uranisioneq, uuliamik gassimilu piianerit immallu naqqani aatsitassarsiorneq naaggaarpagut

Qiningaaffimmi qaangiuttumi aatsitassanut inatsisaasimasoq aatsitassarsioriaatsinut assigiinngitsunut pingasunut agguarlugu nutarterneqarpoq. Inuit Ataqtigiit tulluusimaarutigaat aatsitassat pillugit allaffissornikkut suliaqarnerit sukkaninngortinneqarnikummata, sulianilu tamami avatangiisinut mianerinnittumik aatsitassarsiorneq piumasaqaavoq. Inatsisut nutaaq tunngavingalugu annikitsumik aatsitassarsiorlut aatsitassarsioqatigiiffiit aporfiginagit annikitsumik aatsitassarsiorsinnaanerit ingerlanneqarsinnaanngorpoq.

Inuit Ataqtigiit aatsitassarsiornermut naaggaartuunngilagut, taamaattorli avatangiisigut inuiaqatigiillu inuunerat inuusaasiallu eqqarsaatigalugu killiliussaqluta.

Inuit Ataqtigiit aatsitassarsiornermut angerpugut uranisiornissamulli naaggaarpugut. Uuliamik gassimillu piianerit naaggaarpugut aamma immap naqqani aatsitassarsiornermut naaggaarluta.

Aatsitassarsiornermut aningaasaleerusuttut tikilluaqquagut, inatsisiliatsinulli malitassiatsinnullu ataqqinnissapput.

Ima iliorniarpugut:

- Aatsitassanut periusissiaq nutaaq timalersoneqassaaq, qulakkeerseqassaarlu aatsitassarsiorneq inuiaqatigiinnut iluaqutaassasoq.
- Aatsitassanik eqqussuisunut nunatsinnut soqutigisaqartunut oqaloqateqarneq annertusarneqassaaq.
- Aatsitassarsioqatigiiffimmik nammineq pigisatsinnik aallartisaasinnaanissaq eqqarsaatigalugu partiit akornani oqaloqatigiittoqassaaq.
- Nunaqavissut pinnerasaasiornermik aningaasarsiorluarsinnaanerit suliarissavarput.

Kalaallit Nunaat - avatangiisit eriagalugit ineriartortoq

Nunarput nunarsuarmioqatigiinni akisussaaqataavoq, avatangiisitsinnimmi atuisuuvugut. Issittumi inuuvugut silap allanngorneranik eqqorneqarluta.

Nunatta minguitsuutinneratigut pilersorneqarnikkullu minguinnerusunik atueriaaseqarnitsigut nunarput issittumi nunat minguinnersaattut inississaaq.

Ima iliorniarpugut:

- Nuna tamakkerlugu eqqakkanik isumannaarinissamik kommunit suleqatigiinnerat iluatinnaateqarpoq. Pisariaqartitarput tassaavoq siunissamut ungasissumut isigaluni nunaqarfinni illoqarfinnilu eqqangassaarnikkut suliassaasunik pingaarnersiuinissaq. Naalackersuinnikkut tapertaanissaq siunertaralugu kommuunit isumaqatigiissusiorfigineqassapput.
- Nuna tamakkerlugu nunaqarfinni kuuffissualersuinissaq siunertaralugu pilersaarutit aallartisarneqassapput, kuuffissualersuinnermut suliat tulleriaarinikkut ingerlanneqartussat kommuunit suleqatigalugit aaqqissuunneqassapput.
- Niuernitta avatangiisinut eriaginnittumik ingerlannissaa aallaaviusassaaq.
- Minguitsumik ingerlatsinissaq siunertaralugu erngup nukissiorfiliornit, Utoqqarmiut Kangerluarsunnguani, Aasiaat Qasingiannguullu akornanni erngup nukissiorfiliornit ingerlanneqassapput.
- Naalagaaffiit Peqatigiit piujuartitsilluni ineriartortitsinissamik anguniagaat 17-it nunatsinni malinneqarnissaat siunertaralugu iliuusissat suliarineqassapput.

Kommuunit nunaqarfiillu

Kommuunerujussuanngortitsimanitta kinguneranik innuttaasut oqartussaaqataanerit eqqarsaatigalugu iluarisimaarinninngittoqarnera paasilluarparput. Sutigut tamatigut aaqqissuussineq inuiaqatigiinnut uatsinnullu pitsaanerpaaq ugartortariaqarparput, illoqarfiit ilaat ineriartortinnissaannut kivitseqatigiinnikkut nammaqataaffigissavagut.

Kommuunini innuttaasut sullinneqarnerini unammillernartoqarpoq ingammik inunnik isumaginninneq eqqarsaatigalugu. Isumaginninnikkut inatsisinik aqqissuusseqinnissarput pisariaqavippoq peqatigisaanik kommuunit aqqissuunneqarnerannut aqqiissuusinnermik nutaamik pisariaqartitsisoqarluni.

Ima iliorniarpugut:

- Suleqatigiissitaq kommuunit, pisortat sannaanik ilisimasaqartunit, inatsisartunillu peqataaffigineqartunik pisortat aqqissuunneqarneranut periarfissanik nutaaliornissamillu innersuusaqartussa qilersinneqassaaq. Innersuussut qinersiviup qiteqqunnerani saqqummiunneqassaaq.
- Kommunalbestyrelseni nunaqarfinni aqutsisut sumiiffinni sulitissat pillugit aalajangeeqataasinnaaqullugit nunaqarfinni ineriartornissaq siunertaralugu ataatsimiitsitalianik pilersitsisoqassaaq.
- Inatsisiliulernermi aallaqqaataaniit kommuunit suleqatigineqartarnissaat anguniarlugu suleriaatsinik nutarterissaagut.

Piorsarsimassuseq nukittoq - Inuiaat nukittuut

Piorsarsimassutsitta inuttut pissatsittarpaatigut. Piorsarsimassuseq inuiaqatigiittut isumaliortaatsikkut nikeriarnissamut inuiaqatigiinnilu pissutsinik allannguinnissamut pisariaqartipparput.

Inuiattut inuttullu ataasiakkaatut immitsinnut paasinissatta annertusartuarnissaa pingaaruteqarpoq. Nunaqatigiikkautaarluta inuiaqatigiittullu ataatsimoorluta immitsinnut attavigeqatigiinnissarput inuiaqatigiit namminersortut pisariaqartippaat.

Ima iliorniarpugut:

- Eqqumiitsuliornermut ilinniarfiup aqqissuunneqarnera nutarterneqassaaq, eqqumiitsuliortunngorniarfik ineriartortinneqassaaq eqqumiitsuliortut ilinniarfimmi pitsaassuseq qaffassarneqassalluni. Eqqumiitsuliornermut ilinniarfiup illutaata nutarterneqarnissaa pisariaqavippoq, tamanna aningaasaliiffigineqassaaq.
- Nunatsinni isiginnaartitsinnermik ilinniarfeqarnitsigut qamuuna ilutsigut pikialaartinneqartuarpugut. Ilinninarfiup ineriartortinneqarnermigut illutamigut malinnaannginnera iliuuseqarfigissavarput. Isiginnaartitsisarfittut tulluuttumik ilinniarfeqarnissaa suliarissavarput.

- Nipilersornikkut aaqqissuussat nunatsinni siammarneroqqullugit kommuuninut agguaatassanik aningaasanik immikkoortitsissaagut.
- Piorsarsimassutsimut ataatsimoorussamik naalakkersuinikkut isumaqatigiisummik qiningaaffiit arlerlugit atuuttussamik partiit peqatigalugit suliaqassaagut.
- Katersugaasiveqarnikkut takusassat misigisassallu annertusarneqassapput. Kingornussallu nunatsinneersut angerlaanneqarnissaanik siunertaqartumik suliniummik aallartitsisoqassalluni.

Timersorneq

Timersoqatigiit Kattuffiata nunarsuarmi aalanerpaanngorniarluni anguniagaa tapersorsorparput. Timersornikkut siunniussat tapersersussavagut. Timersornikkut ingerlatsineq inunnik kajumissutsiminnik sulialinnik annertuumik ingerlatsiffiusarpoq.

Ima iliorniarpugut:

- Kajumissutsimik suliaqartut timersortunik angallasseqataatillugit annaasaqartannginnissaat anguniarlugu aningaasanik qinnuteqarfiusinnaasumik sulissuteqassaagut. Tapiissuteqarnissamut periarfissat kattuffiit, sulisitsisut sulisartullu kattuffii suleqatigalugit suliarineqassaaq.
- Timersornikkut aaqqissuussani angalanermut angingaasartuutit suliaasaasartullu annertusarput, pisortat angalatitseqatigiiffii peqatigalugit timersoqatigiiffinnut aaqqissuussaasumik politikkiliussaagut.
- Timersortarfiit sinerissami nutaanngilisut amerlapput. Illutatigut nutarterinissat nunaqarfinnilu timersorfiusinnaasunik pilersitsiortornissaq siunertaralugu suliat susassaqartunit, kommuuninit, Timersoqatigiiffiit kattuffiannit atuisartunillu peqataaffigineqartut aaqqissuutissavagut. Ukiunut qulinut tullernut suliaqatigiissutigineqarfiusussamnik suliaqassaaq.

Kalaallit Nunaat- Kalaallit pigaat

Namminiilivinnissarput uagut ilutsinni suliarissavarput. Namminiilivinneq kiffaaffinngissuseqarnerulernermik oqartussaaqataanermillu kinguneqassaaq.

Namminiilivissaagut, isumatusaarluta, nunarsuatsinnilu pissutsinut akisussaaqataalluta minnerunngitsumillu inuiaqatigiinni inuit atugaasa pitsaanerulersinnissaanut nunatut ataatsimoorussamik pilersaaruteqarluta.

Pissutsit taamaaginnartussatut isiginagit sulisariaqarpugut. Maanna Kunngeqarfik Danmarkimik suleqatigiinnerput tamaa iluseqartillugu attanneqarsinnaanngilaq. Danskit naligalugit inuulernavianngilagut, danskiunnginnatta. Danskit kunngeqarfiata inatsit tunngavigisaannit kaanngarnissarput suliassaraarput.

Namminiiliviakkiartornermut ingeranitsinni inuiaqatigiittut sutigut tamatigut inerisassaagut. Uatsinnut pitsaanerpaaq anguniarlugu sulinissarput pingaaruteqarpoq.

Nunatta nunarsuarmi sillimaniarnikkut inissisimanagera nunattalu pisuussutaasa atornerqarnerat eqqarsaatigalugit nunanik allanik suleqateqarnissarput pisariaqarpoq.

Nunarput nunanik allanik kiffaanngissuseqarluni suleqateqarsinnaavoq. Niuernikkut, aatsitassarsiornikkut, inuussutissarsiutittalu ineriartortsinneqarneranut, ilinniartitaanikkut kulturikkullu suleqateqassaagut.

Nunatta namminiussuseqarnera oqartussaassuseqarneralu annertusarlugu sulinerput ingerlavoq. Nunarput issittumi akisussaaqaavoq. Nunatsinnilu siuariartornissatsinnut oqallisaaginnarata peqataatinneqartuarnissarput suliarissavarput.

Uagut nunarpullu pineqartilluta peqataassaagut. Inuiattut, inooqatigiinnikkut aningaasarsiornikkullu napatinnissarput angutserlugu sulissaagut.

Ima iliorniarpugut;

- Partiit tamarmik namminiiliviarnitsinnut suleqatigiissapput
- Innuttaasut nammiivinnissamat ingerlaarnermi peqataatinneqassapput. Innuttaasut nalorninatik naliliisinnaanerata paasissutissiinnikkut suliarneqassaaq.
- Namminersornermut inatsit inatsisitigut sinaakkutaasoq maanna aningaasarsiornikkut siuariartornissatsinnut annertuumik akimmiffissaqartitsivoq. Inatsist aammalu Kunngeqarfik Danmarkimik suleqateqateqarnermi sinaakkutaasut allanngorluinnartariaqarnerat pisariqarpoq. Qiningaaffik aallartippat partiit katersorneqassaput qanorlu danskit naalakkersuisuinut ataatsimoorussamik piumasaaqateqarnissarput suliarineqassaaq.

Nunatut kiffaanngissuseqarluta suleqateqallaqqissutsimik takutiitsissaagut.

Aqutsinermi naleqartitat

Qinikkat akisussaaffimmik immikkuullarissumik akisussaaffeqarput. Ulloq unnuarlu nunatsinnut innuttaasunulu sinniisuupput tamallu oqartussaaqataanerata atuutsinneqarneranut akisussaaffeqarlutik. Tamanna ilumoorullugu tiguneqanngippat innuttaasut tatiginninnerat tamallu oqartussaaqataanera tunngavingalugu ingerlatsivinnut tatiginninnginneq milliartussaaq.

Isumaqarpugut sumiluunniit politikikkut inissimaffeqaraanni peqataalluni, peqqissaarluni allanillu isumalinnik tusarnaarsinnaaneq pisussaaffiusut.

Naalackersuisuvut innuttaasunut tamanut naalackersuisuupput aamma isummat nikerarfiini tusarnaarsinnaassuseqassallutik. Naalackersuinikkut patajaatsumik sulineq qiningaaffillu naallugu sulinissaq pingaaruteqarpoq, inuiaqatigiittummi ima suliassaqartigaagut immitsinnut suleqatiinngikkutta innuttaasunut artukkiiginnartussaalluta. Suleqateqarsinnaaneq isummallu katersuutsillugit naaperiteqarsinnaaneq nunatsnnut innuttaasunullu toqqissisimatitsinermik pilersitsissaaq.

Aaqqiissutissarsiortumik politikkeqarnissaq uatsinnut pingaaruteqarpoq, iliuuseqarsinnaanngortarpugut aaqqiissutissarsiortilluta. Naalackersuisoqatigeeqartarneq aamma illuatungiliuttoqartarneq imminermi ajoquteqanngilaq, tamannali tamanut akisussaaffimmik tigusinissamik piunasaqaateqartoq isumaqarpugut. Uatsinnulli tamanit pingaarneq taassaavoq inuiaat kalaallit ataatsimoorfigisaminnik nukittorsaanissaat ineriartortinnissaallu.

Asasagut innuttaqatigut tamassi marsip 11-ni 2025 oqartussaaqataanersi atorlugu qinersiartorluarnissassinnik kissaappatsigit.

Assigiinngilagut ataatsimoorpugulli